

海之術也人倫明於上小民親於下國家自安 宗社永賴昔者孟子勸齊梁行王道以齊梁之時孟子猶為是說是則無不可為之時也事半古之人功必倍之惟此時為然 殿下亦在乎為之而已國家為政上不逮王道下不及霸業坐看危疑未免以千里畏人苟無其德無以鎮之舟中人皆是我敵人之說甚可畏也一念之私有蔽於君心中於朝廷終於四方歸於亂亡者都是一箇私其可不戒哉伏願 殿下懋哉 荅曰省疏具悉深嘉爾誠所陳之辭無非格言至論予敢不體念而力行哉○甲寅太白晝見○夜一更月上有赤氣直立長三尺許廣尺餘移時乃滅月犯軒轅星五更木星守房星上○乙卯太白晝見○號牌廳啓曰落講校生勿定軍役並為收布事已為定奪矣竊念 祖宗朝造士之方靡所不至為設教授訓導之任分置各邑專責教訓又令都事以時考講其有不率教者汰定軍保亦不屑之教誨也頃年以來教率之方不行訓導為數慢之資校生作避役之流識者之寒心久矣今之大舉汰降之政固不可已也然名曰學校義重存羊教率不先而責罰遽加先後之序未免顛倒雖曰國家本意不專在於充伍人誰信之竊聞號牌令下之後外方儒生處處誦習雖曰騰口之學無補於身心而亦不可謂無所益也然既無前功又迫